

CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DO PEREIRO DE AGUIAR PARA ACTUACIÓNS DE MELLORA TURÍSTICA NO CONCELLO

O xerente de Turismo de Galicia

DECLARA:

Que esta Axencia de Turismo de Galicia formalizou co Concello do Pereiro de Aguiar o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2025.

Que o instrumento convencional ten por obxecto establecer o marco de colaboración entre Axencia de Turismo de Galicia e o Concello do Pereiro de Aguiar para actuacións de mellora turística no concello.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia de Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

Segundo.- Un dos obxectivos prioritarios do Concello do Pereiro de Aguiar é o seu desenvolvemento turístico, como porta de acceso natural dende a capital da provincia



de Ourense á Ribeira Sacra (candidata a ser declarada Patrimonio da Humanidade). Unha aposta decidida pola recuperación da importante riqueza histórica, cultural, patrimonial e paisaxística para o seu uso, non só por parte da veciñanza local senón que para dotar de servizos á área metropolitana de Ourense que supón máis do 5% da poboación galega. Estes, xunto co cada vez máis elevado número de visitantes fai que o gasto en equipamentos turísticos mude de vez nun investimento que xera un importante retorno socioeconómico ao municipio.

Nos últimos anos téñense reformado e actualizado os carteis en estradas para informar do mellor acceso en vehículo motorizado aos puntos de interese dentro do municipio. Foi posible igualmente instalar segundo o Manual de Sinalización Turística da Xunta de Galicia (sinalización estática de Patrimonio Monumental) paneis informativos nas principais igrexas do municipio. A esta mesma estratexia responde a construción dun gran parque acuático no termo municipal, infraestrutura que atraerá a numerosos visitantes de diferentes lugares en época estival. Ao que responde igualmente a consolidación da Festa Etnográfica coa que se pretende protexer a tradición e xerar ao tempo un evento cultural que introducir na axenda festiva galega.

En paralelo a todo o anterior, actuacións executadas en anos anteriores teñen permitido aumentar o interese turístico do Pereiro de Aguiar cunha rede de sendeiros de máis de 50 km que dan continuidade a unha estratexia de diversificación e desestacionalización da oferta, permitindo estas infraestruturas gozar da riqueza monumental, cultural e paisaxística do concello en calquera época do ano.

Sumado a todo o anterior, na anualidade 2023 avanzouse na creación dun punto de información que permita a visitantes e usuarios destes equipamentos recibir toda a información centralizada, poñendo en valor e conectando todos os recursos turísticos de maior relevancia dentro do concello do Pereiro de Aguiar, tanto dende un punto de vista natural como etnográfico, histórico e cultural. O obxectivo final é mellorar o acceso á información da ampla oferta turística da Ribeira Sacra, á que se suma a única Estación de Esquí de Galicia en Manzaneda, sendo O Pereiro de Aguiar paso obrigado tamén para amantes da neve dende a capital provincial, norte de Portugal e provincias de Pontevedra e Coruña.



A recuperación e posta en valor de todo o patrimonio natural e cultural anterior permite que o estado actual do conxunto turístico presente unha faciana moi positiva. Con todo, a tenor deste proxecto, faise necesaria seguir mellorando no fortalecemento do concello como un referente turístico, porta de entrada natural á Ribeira Sacra.

Terceiro.- O Concello do Pereiro de Aguiar pretende levar a cabo as seguintes actuacións de mellora turística no municipio:

A) Obras de mellora da sinalización turística por estrada:

1) Fabricación e colocación de sinalización de estradas nas principais vías de entrada ao concello do Pereiro de Aguiar, como porta de acceso ao destino Ribeira Sacra.

2) Fabricación e colocación de sinalización direccional de estrada (presinalización a un elemento de alto interese) a situar previa chegada á rotonda de entronque entre as estradas OU-536 e OU-0508, que permita orientar ao visitante das diferentes vías de acceso ao destino Ribeira Sacra.

3) Fabricación e colocación de rótulo composto por letras corpóreas na rotonda inmediata ao Parque Acuático de Monterrei (OU-537).

B) Obras de embelecemento de accesos a recursos turísticos:

1) Deseño e execución de mural de grande formato (120m²), como recurso artístico para o embelecemento da fachada oeste que recibe ao visitante na entrada ao municipio na estrada OU-536 (Lugar de Castadón).

2) Obras de recuperación e restauración de mural artístico realizado en 1990 polo pintor Virxilio na rotonda de entronque das estradas OU-536 e OU-537.

3) Deseño e execución dunha estatua en bronce sobre base de granito a situar na rotonda de entronque entre as estradas OU-536 e OU-537.

O principal obxectivo das actuacións recollidas nesta memoria é a sinalización de diversos atractivos turísticos e patrimoniais do concello do Pereiro de Aguiar, así como a mellora do sector turístico do municipio mediante a adecuación da sinalización á



recollida no Manual de Sinalización Turística da Xunta de Galicia, creando unha sinalización homoxénea e atractiva para os visitantes.

Mediante as obras de embelecemento de accesos aos recursos turísticos preténdese mellorar a percepción do territorio ligado ao xeodestino Ribeira Sacra para aqueles visitantes e usuarios das vías que atravesan o concello.

Que a través deste convenio, outórgase ó Concello do Pereiro de Aguiar unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

